



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

iv La vie de saint Vdalric, Euesque d'Ausbourg, Confesseur.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

4.
Ivii.
LET.

seaux dont il les menaçoit. Il print son baston, & fit le circuit d'une partie de la ville, plorant & criant: Faites penitence, & considerez que Dieu est irrité, qu'il leue le bras pour vous frapper. Il sortit de Seuille, & guarit sur le chemin vn aueugle: s'estant embarqué il vint aborder à Marseille, où il resuscita l'enfant d'un des principaux bourgeois. De là il passa en Italie, & se rendit à Rome, guarissant plusieurs malades par les chemins. Le Pape fut fort consolé de sçavoir l'estat de son Eglise de Seuille, & sa maniere de viure. Il dit la Messe Pontificale deuant sa Saincteté, le iour de la Chaire saint Pierre, & guarit vn vieillard qui estoit estropié des pieds & des mains dès son enfance. Apres qu'il eut satisfait à sa deuotion, & à ses affaires, il partit de Rome pour s'en venir visiter le tombeau de saint Martin de Tours: là s'estant mis deuotement en prieres, il eut reuelation que le Roy Totila enuoyoit des soldats pour le tuer, le saint ne s'en estonna ny affligea nullement, au contraire se laissant emporter au desir du martyr, il les alla chercher, & les rencontra en vne pleine campagne, il se presenta à eux, lesquels l'ayant recogneu, l'empoignerent, & luy trancherent la teste. Comme ces meurtriers achenoient de la couper, ils s'enfuirent tous esperdus, & le saint desia mort, leur cria qu'ils vinssent prendre sa teste pour la porter à Totila, comme il leur auoit commandé. Ils la retournerent donc querir, & en firent present au Tyran, lequel ayant sceu ce qui s'estoit passé à sa mort, l'enuoya à Seuille, laquelle commença à respirer: souz la faueur de ceste sainte Relique, la secheresse, la peste, & la famine dont nostre Seigneur auoit affligé ceste ville-là, cessa dès lors. Eusebe Euesque d'Arles inhuma le corps du saint en l'Eglise de Bourges, par vne reuelation diuine qu'il en eut. Valée dit que la mort de ce saint aduint l'an 544. Il est fait mention de luy dans les Martyrologes Romains, de Bede, Vfnard, & Adon, & es Annotations du Cardinal Baronius.

LA VIE DE SAINT VDALRIC,
Euesque d'Ausbourg, Confesseur.



Abbé Bernon escriuit la vie de S. Vdalric Euesque d'Ausbourg, ainsi qu'elle est rapportée par Surnius en son 4. Tome. Vdalric naquit des illustres Comtes de Dillingue: son pere s'appelloit Hupaud, & sa mere Tiburge: il fut banny trois mois apres sa naissance: on remarqua dès son ieune âge de grands traits de sainteté de sa vie. Ses parens qui estoient pieux le firent nourrir par les Religieux du Conuent de saint Gal, afin qu'il peust apprendre parmy eux les sciences humaines, & les vertus diuines: ce ieune enfant prit tant de plaisir en la contemplation diuine, qu'il resolut de renoncer tout à fait au monde, pour embrasser la vie Religieuse, & l'eust exécutée, sinon qu'un

ne sainte fille nommée Viuerette, qui s'estoit recluse entre quatre murailles l'en desuourna, luy disant, qu'il n'estoit pas encore temps. Il retourna chez ses parens, lesquels le trouuant fort aduancé aux lettres, le recommanderent à Adalberon, qui estoit lors Euesque d'Ausbourg, homme saint & venerable, qui le print en sa charge, & ayant esprooué son sçauoir & sa vertu, il traitoit fort familièrement avec luy, l'employant à ses affaires domestiques dedans & dehors, au grand bien & contentement de toute son Eglise.

Il desira d'aller à Rome pour visiter les tombeaux des Apostres saint Pierre & saint Paul, & autres deuotions de la ville, & y fut humainement receu du Pape, qui luy demanda qui il estoit: il respondit qu'il estoit Alleman, Clerc, & domestique de l'Euesque d'Ausbourg Adalberon. Le Pape luy rephqua: Vostre Euesque est decédé, & Dieu veut que vous luy succediez, & preniez le soin Pastoral de ceste Eglise. Le saint fut bien estonné de ces paroles, & s'estimant indigne de telle charge se retira tout confus, & s'enfuit de Rome. Sa Saincteté aduertie de son absence, nomma Hilton Euesque, & dict: Si Vdalric ne veut point conduire l'Eglise d'Ausbourg maintenant qu'elle est en repos & tranquillité, il sera contrainct d'en prendre la charge lors qu'elle sera troublée & agitée d'orages, ainsi qu'il aduint quinze ans apres, que Hilton estant passé à vne meilleure vie, Vdalric fut forcé par le Roy Henry, & par tout le peuple d'accepter l'Euesché. Si tost qu'il y fut establi il rendit des preuues de sa grande sainteté, & fit le deuoir d'un soigneux & vigilant Pasteur. Il estoit tousiours occupé en l'Oraison, où à la lecture des bons liures: Il affligeoit rudement son corps, ne mangeoit iamais de viande, & auoit plusieurs pauures à sa table qu'il nourrissoit & entretenoit liberalement, il parloit peu, sagement, & avec efficace, pour persuader ce qu'il vouloit, ses paroles estoient autant de sentences d'un grand poids.

Il celebroit la Messe avec beaucoup de deuotion; & vn iour qu'il estoit occupé en ce sacré mystere lors qu'il voulut prendre l'Hostie pour la consacrer, les assistans veirent vne main qui descendoit du Ciel, laquelle se iaignit à celles du saint Euesque, pour luy ayder à faire cette consecration diuine. Vne autre fois qu'il vouloit vn peu reposer, sainte Astra martyre d'Ausbourg s'apparut à luy avec vn visage vermeil, vestue à l'aduantage, laquelle le tira au champ où il trouua l'Apostre saint Pierre, qui estoit assis parmy vne multitude de Saints, lesquels demandoient vengeance à Dieu de ceux qui les auoient affligés & persecutez. Ils crioient spécialement contre Armenulfe Duc de Baviere, pour lors viuant, qui auoit destruit plusieurs Eglises & Monasteres, & donné leurs reuenus aux seculiers, & Armenulfe fut condamné par le seul iugement de tous ces Saints. Nostre Seigneur luy fit plusieurs autres reuelations, en luy descourant les choses à venir long temps auparauant qu'elles arriuaissent. Il auoit vn grand

grand soin de reparer les Eglises décheutes & ruinees de vieillesse, ou brulées & renuerfées par les ennemis : mais encore plus d'edifier & reduire les ames perdues par les pechez & mauuaises coustumes. Il eut particulièrement soin d'extirper la simonie, qui estoit fort enracinée de son temps, & les autres abus qui se glissent insensiblement & peu à peu en la Republique quand les Pasteurs s'endorment, au lieu de les arracher auant qu'ils aient pris pied. Il y eut vn grand debat entre l'Empereur Oton & son fils Ludolfe, iusqu'à leuer les armes, prests à s'entre-donner bataille. Saint Vdalric en estant aduertie print avec luy Halderbert Euesque de Curie, & se ietta entre les deux armées, où il fit tant par sa sainteté & eloquence qu'il les arresta, & establi la paix entre ces deux puiffans Princes. Vdalric ne se contenta pas d'auoir esté vne fois à Rome par deuotion, il y retourna encore, & en rapporta le chef de saint Abondie Martyr, qui fut receu à Ausbourg avec beaucoup d'honneur, & nostre Seigneur magnifia Vdalric par plusieurs miracles, guarissant les malades de diuerses maladies par son intercession. Il deliura aussi la ville d'Ausbourg de la main des Hôgres qui auoient ruiné ces Prouinces, & la tenoit estroitement assiegée & nostre Seigneur Iesus-Christ les chastia à la priere du saint Euesque, la pluspart d'entr'eux y mourut, & le reste leua honteusement le siege. Plusieurs ecclesiastiques & du menu peuple estans demeurez pauvres & necessiteux, à l'occasion des rauages & calamitez qu'ils auoient soufferts des Barbares, les saint Euesques s'efforça de les secourir par vn soin & charité extrême, iusqu'à se despoüiller soy-mesme pour les reuestir. Il aduint vne chose notable à ce Saint, sur ce qu'il desiroit infiniment de quitter la charge Pastorale, pour s'adonner dauantage à l'oraïson & comtemplation. Il auoit vn nepueu, fils de sa sœur, nommé Adelbert, auquel il resigna son Euesché : mais il trompa son oncle, se laissant emporter à la vanité, en sorte que nostre Seigneur Iesus-Christ l'appella au bout de quelques mois. Vdalric qui estoit préparé à la mort, ayant desia distribué aux pauvres tout ce qu'il auoit, & demeurant continuellement en pleurs & en prieres pour obtenir de nostre Sauueur & Redempteur Iesus-Christ la remission de ses pechez, commença à se plaindre vne fois, comme en se refueillant d'vn profond sommeil. Halas ! pleust à Dieu (dit-il) que ie n'eusse iamais cogneu mon nepueu Adelbert, car les Saints ne me veulent pas admettre en leur compagnie sans punition, parce que ie me suis laissé aller à son desir, tesmoignant qu'il auoit failly de commettre le gouuernement de l'Eglise à son nepueu, & qu'il expieroit ce peché en Purgatoire. Exemple fort remarquable, & semblable à celui que le Pape saint Gregoire raconte en ses Dialogues, de Paschal Diacre de l'Eglise Romaine, hommeremply de sainteté, mesme que lors de son enterrement il guarit vn demoniacle qui tou-

cha à sa chapelle : son ame s'apparut à saint Germain euesque de Capoue, dans vn bain où il exploït vn peché qu'il auoit commis, pria saint Germain d'interceder pour luy, lequel ayant fait son oraïson, raschal demeura deliuré des peines de purgatoire. On tire deux choses de ces exemples, l'vne qu'il n'y a si petite faute pour laquelle il ne faille satisfaire en ce monde-cy ou en l'autre. La seconde, qu'vn homme peut bien estre saint & faire des miracles, qui passera neantmoins par le purgatoire. Pour retourner à saint Vdalric, il demanda pardon à toute l'assistance, & rendit l'esprit entre les bras de ses Chanoines, qui fondoient tous en larmes, aagé de 80. ans, le 50. de son Episcopat, l'an 573. le quatriesme de Iuillet, sous l'Empire d'Oton II. fut inhumé en l'Eglise de saint Asta Martyr, où nostre Seigneur fit plusieurs miracles par luy. Il est parlé de luy es Martyrologes Romains, de Bede, & Adon.

A tel iour moururent les saints Prophetes Osée & Agge. En Afrique saint Incundian martyr fut pour l'honneur de nostre Sauueur ietté en la mer. Au diocèse de Bourges mourut saint Laurian Martyr. A Simore en Lombardie les saints martyrs Innocent, Sebastie, avec autres treize. A Cyrene ville de Lybie saint Theodore Euesque ayant esté batu de plombaux, & en la langue coupée durant la persecution de Diocletian sous le President Dignian, mourut depuis Confesseur. A Madaure, qu'on appelle à present Oran en Affrique mourut saint Namphamion martyr avec ses compagnons, lesquels il encouragea au combat par sa parole & exemple, les conduisant iusques à la couronne. A mesme iour les saints Flavian second, Euesque d'Antioche, & Elie Euesque de Hierusalem, ayant esté enuoyez en exil par l'Empereur Anastase, comme protecteurs du saint Concile tenu en Calcedoine, apres la mort du tyran, ayant accomply le cours de leur combat, passerent à vne meilleure vie. A Ausbourg en Allemagne trespassa saint Vdalric Euesque, personnage de rare abstinence, liberalité & vigilance, & qui a fait plusieurs miracles. A Rome sainte Romule vierge, le decez de laquelle fut honoré d'une troupe de bien-heureux, comme escrit saint Gregoire.

A Rome sainte Zoë femme de saint Nicofrate martyr, priant Dieu prez du sepulchre de saint Pierre, fut prise durant la persecution de Diocletian, mise en vn bas de fosse tres-obscure, puis pendue à vn arbre par le col & par les cheueux, où ces enragez luy exciterent vne si horrible fumee, qu'elle en fut estouffée. En Syrie deveda saint Domic martyr, lequel par ses vertus & miracles fait beaucoup de biens aux gens de ces quartiers là. A Cyrene ville de Lybie, sainte Cyrille tint vn long temps des charbons ardens avec l'encens qu'on luy auoit mis dans la main, de peur que les secoüant, les assistans n'estimassent qu'elle eust sacrifié aux idoles : par apres ayant esté deschirée & empourpree de son sang, alla au deuant de son Espoux nostre Dieu & Sauueur, & ce durant la persecution de Diocletian. En Hierusalem saint Athanase Diacre, defendant le saint Concile tenu à calcedoine, fut pris par les heretiques, & tourmenté en toutes les façons desquelles ils se peurent aduiser, & en fin eut la teste tranchee. En Sicile moururent les saints martyrs Marin, Theodote, & Sedophe. A Treues saint Numerian Euesque & Confesseur.

4.
Ivrit.
LET.

5.
Ivrit.
LET.